

湖
海
文
傳

湖海文傳卷四十四

青浦王 弘德甫輯

書

與友論齊期稽首書

李 果

湘湖程長公之逝有四子焉而護其喪者實其弟次公凡賓客自遠方來弔者餽儀邀設皆護喪者具名客以爲問僕答以宜書期服某稽首他日客見之謂期服之拜頓首已足稽首則過矣羣議焚如僕小人也何足以知禮欲求其是必原本禮經準今酌古上合國家之制又不背朱子家禮之宜乃得之乎夫禮喪有四制有恩有禮有節有權取之人情也本朝會典爲兄弟服齊衰不杖期與朱子家禮同考之儀禮兄弟不杖麻屨註謂正服衰五升冠八升功麤大不精者

也雜記三年之喪以其喪拜非三年之喪以吉拜吉拜而後稽顙也則是齊衰以下皆拜而後稽顙孔子曰拜而後稽顙類乎其順也哀痛之至先加敬於人後盡哀於己爲得序也喪服小記大夫弔雖總必稽顙必稽顙者尊大夫也齊衰貌若哀此哀之發於容體者也齊衰之哭若往而反此哀之發於聲音者也其說載於閒傳而檀弓又云齊衰不以邊坐謂喪服宜敬起坐必正不可偏倚也王制齊衰大功三月不從政由是言之齊衰之不可忽也如此而謂稽首爲過乎僕又考周禮太祝辨九拜之儀有稽首頓首空首振動吉拜凶拜奇拜褒拜肅拜之文鄭註稽首如今跪拜禮頭隨手至地稽留乃起也頓首如今叩頭之類首叩地也吉拜拜而後稽顙謂齊衰不杖以下之拜卽殷之凶拜言吉者對下文爲輕

也。因拜若是則頓首爲常接之儀也。夫人而身在齊期之喪猶以常接之儀施諸來弔者得毋不合於禮乎。雖近俗未嘗無用之者。未可以俗所用爲是而古所載爲非也。湘湖友愛諸弟諸弟咸資渠誨奉爲家督一門百口三十年共爨汲有義門之風其卒也倘棄周公孔子之教而跪拜與無服者無異吾不知其可也。幸明以示我。

上馮師問喪儀書

陸燿

不孝慘遭大故昏迷不知所措恃老夫子之提誨如夜行而得燭誠不孝萬千之幸。兩次辱臨飫聞至訓不孝謹稟奉行深懼弗逮惟外間或以反古爲疑不孝循省內訟自以爲皆遵今制並非古禮如冠服及百日剃頭皆京師職官士庶上下現行之例。又按大清律凡有喪之家必須依禮安葬注

云三月而葬官員庶人同又云若感於風水及托故停柩在家經年暴露不葬者杖八十今不孝擬二月安葬已逾三月之限過此以往近於托故暴露者義所不敢出也又名律居父母喪作樂列在十惡之條例內亦稱民間喪祭之事凡有絲竹管絃演唱佛戲之處照違制律治罪不孝擬不用音樂亦今制也律又云居喪之家修齋設醮若男女混雜飲酒食肉者家長杖八十不孝擬止用素饌又今制也未郡創見以爲古禮不知區區一念惟以恪遵王制爲務不敢自託古人以驚世而駭俗也今音樂一事查會典內所載品官喪儀有陳設執事前鞍馬五匹之文其執事名數康熙七年題准不過數件並無音樂若權照藩臬衙門早晚鼓吹之例設立鼓棚亦只可懸而不作免致喧雜至待客酒肉則以不孝蘆

墟舊俗悉用素饌鄉間淳樸之風不可自我壞之若郡人食
肉鄉人食素又啟非議之端故前有一槩食素之意蒙諭以
爲不便自宜改之設有故鄉親友留心於風俗之奢儉歸咎
於不孝者其過至小可以情諒也以上諸條就師訓所及而
申請教益者此外尙有點主一事不能自決敢并以請示於
左右古者始死立重虞而後立主用桑練而後用栗主然則
初喪之主尙不以祔廟永祀謹書生卒年月於陷中某官某
對於主外以此調題主可矣何爲獨虛王字之一點延請有
爵位者先朱後墨而以爲光寵乎劉山蔚曰服官者簿書教
令皆用朱以下行上焉者不敢也人子於父母而使人肆然
下臨之是豈所以尊之乎不孝前遭先君之喪固未嘗請人
今茲欲循舊例親泣血而書之并不虛王字之一點以待貴

官長者之辱題不審於理有合否伏惟明示苦由餘生五中
無主禮經迂遠固不可施於今日卽書儀家禮亦繁重難勝
不孝僅采用十之二三而已不免或疑其反古是可懼也然
人情固有始而駭中而服久而且化之者流寓之人未諳土
俗所仗老夫子爲之護持使得伸其人子自致之情庶幾不
悖禮律而亦不至大爲指摘之叢則其感激至誠猶死生而
肉骨矣不孝耀惶恐謹上

與朱同升兄弟書

魯九臯

客冬小力同仰蒙回示具稔一切世兄孝思肫摯當此讀禮
之際憂傷之懷自有非常情所及者然先生耆年正賴賢昆
玉左右就養尙冀以禮節哀庶老人稍自遣懷耳蓋古者父
在爲母齊衰期非獨母以父壓也齊衰期者夫爲妻服也夫

之於妻期而除其服矣而子之服猶不除是不有其父也故
人子父在居母之喪其不飲酒食肉不御內未嘗不以三年
爲期而其服則從父之服以齊衰期爲斷此先王制禮之精
也後世服制雖異於古而讀書君子所以事其父者猶宜準
是以自盡焉禮又有之大夫七十而致事行役以婦人某嘗
深思其故凡人至老惟男子最苦雖有甚賢孝之子然疾痛
疴癢有時不能語諸其子者故行役非婦人不可也先生此
時年雖尙未七十然體素肥盛多痰夜臥晨興衾枕之間行
役不可無人此中視無形聽無聲賢昆玉尤宜細加體察焉
某以家父衰老多病曲求一善於行役之人而不可得乃悟
先王禮制之精辱在先生門下與賢昆玉有兄弟之好故不
揣淺陋而進是說然在賢昆玉諒素所熟講者惟鑒其愚衷

可耳不一

與某刺史書

袁枚

寄示詩四卷俱衰經中哭中丞公之作具見純孝發於心聲然區區之見有不敢不自之左右者禮大功廢業又曰嬰兒哭其母何常聲之有足下斬衰之喪非止大功有韻之詩非止常聲以禮律之似足下在服中不得爲詩縱爲詩不得哭父古惟傳感孫綽有服中哭母詩是時東晉清談禮教陵遲不可爲訓自唐以來詩人林立孝子亦林立未聞有以哭二親爲題者蓋至親無文詩固言之文者也不文不可以爲詩文則不可以爲子兩者相背而馳故從來畫家無畫天者輓詩無輓父者劉畫作六合賦昔人以爲大愚若以罔極之恩鋪陳諸聲調之末是卽畫天賦六合之類也子夏免喪彈琴

而不成聲足下未免喪握筆而已成韻異乎僕所聞僕方慮足下性耽吟咏或三年中不能忘此結習偶有所作亦必假其年月于服前服後以免于君子之譏而不意足下之卽以禮所禁者而暴章之也韓昌黎于十二郎從子也其祭文獨不用韻蓋雖期功之喪亦有不忍文之之意焉足下孺慕不已故長言之長言不已故咏嘆之原非以此爲名也然果合乎禮以得名尙非孝子之心所願乃背乎禮以累名又豈孝子之心所安公羊曰仁不勝道記曰詩之失愚此之謂矣足下盍取服中所作哭而焚之中丞公有知必以愚言爲是諛足下者豈不曰三百篇中亦有陟岵蓼莪諸作不知陟岵者孝子行役之詩其親存也蓼莪者刺幽王之詩毛傳可考也

與顧肇聲論墓銘諸例書

沈彤

昨辱手簡商酌墓銘諸例各有證佐非頃刻所能定熟思詳
考乃敢決言之蓋古人之銘廟與墓兼用之而誌則專用之
於幽室南豐所寄歐陽舍人書乃謝其撰先大夫墓碑銘而
作碑銘非幽室所用故其書雖嘗因銘及誌而所云或納於
廟或存於墓者固不論誌而但論銘也衛孔惺之鼎銘晉魏
顓之景鐘銘銘之於彝器韓文公之烏氏廟碑銘袁氏先廟
碑顏魯公之家廟碑銘之於碑石是皆所以納於廟者也於
墓誌無與其存於墓者埋諸壙中則有若葬銘埋文墓誌銘
墓輒文墳記墳記之屬立諸神道則有若墓表碑文墓碣銘
神道碑阡表之屬其名兩不相假未有墓誌而立石壙外者
惟南史裴子野傳載一事此當時藩王破常例重疊爲之耳
傳云子野之葬湘東王爲墓誌銘陳非其正也故碑碣與表

於藏也邵陵王又立墓誌埋於羨道

葬後可刊而誌銘必先期而作其有葬期迫而不及攻石者則書石以誌旣葬刊文卽不復追納之於壙若昌黎誌李元賓墓之類是也其立石在祠堂若丙舍蓋亦有之今奉委所作墓銘距葬時實遠幽室不得用其文但宜施於表碣顯刻墓前不當名之爲誌刊藏丙舍唐之葬令凡五品以上爲碑龜趺螭首降五品爲碣方趺圓首是碑與碣異制也明制三品以上神道碑四品以下墓表黃梨洲謂自有墓表更無墓碣知墓表亦方趺而圓首是碣與表同制也隋唐人之命碑碣表多稱其實後世或有碑其碣而碣其表者然考本朝律處士不禁其用表碑與碣惟品官得立與唐令不殊則刊石固有定制而名號亦不得僭亂今之所刊但用碣制而定名墓表焉其可也至碣身高廣之度古碣高四尺會典所載

圓首碑七品以下用者高五尺五寸濶二尺二寸今石表或於二者之間增損定之若所示樣本慮太卑狹不稱言直無文幸鑒其意有未當者惟不憚往復是望

復梁少師書

杭世駿

錢氏云古人合葬題不書婦人曰暨配某者空同以後不典之辭也梨洲黃氏亦云婦人從夫故誌合葬者其題只書某官某公志銘或墓表未有書暨配某氏也引張說爲蕭灌楊炯爲王義重兩神道碑爲證且曰自唐至元皆無夫婦同列者徐司寇作讀禮通考據其舅氏亭林先生所撰金石文字記有澤王府主簿梁府君并夫人唐氏墓志銘四品孫義陽朱賓撰唐武后垂拱四年十一月也又滎陽鄭府君夫人博陵崔氏合葬墓誌銘泰貴撰宣宗大中十二年十二月也據

此則古人亦有書婦者矣錢黃兩氏良由未見兩碑輕易詆駁未可卽爲定論閣下太夫人先歿歷二十年朝廷復有贈典照耀遠近固當鄭重特書况梁府君又君家之前事乎但其志新出終南山梗梓谷土中錢黃二氏皆未及見王遵巖處士陳東莊公暨配黎氏墓表魏叔子楊一水同配嚴孺人合葬墓表暨袁君泰徵同配吳節母合葬墓志銘二君皆名能古文者其文炳見於集中如有譏我者可援以相證矣又古人之行文與作事皆有就簡之理何謂就簡其一夫一婦固己人有再娶至三四娶者矣吾鄉沈端恪公蓋嘗五娶皆已前歿神道之碑亦鄙人所撰若皆列則額隘而不可篆其皆削而不列亦事勢然也或夫在而妻先卒別爲立碑昌黎爲都統韓印妻撰銘是也或子爲母刻石臨川爲楊學士

母撰誌銘是也其首必冠以某官某之妻誠有如梨洲黃氏所云至於夫自立碑或書配某或不書則因乎其人因乎其時於禮無礙原無一定之制亦無一定之例也而爲金石之例者必沾沾執一例以相繩不亦愼乎鄙人文不足重閣下聲華爵位爲海內所具瞻既不爲例所拘又有所據依而非出於獨創斷然行之可無疑也

論汪涵存墓誌書

王元啟

古人誌墓雖標題亦各有義指石介嘗位於朝歐公不書其爵書曰徂徠先生至尹洙則爵號皆不書直書爲尹師魯墓介稱徂徠誌中已言其義洙書姓字則見於集中與人之書牘皆非苟爾讀昌黎貞耀先生李元賓二誌是卽歐法所本也又古人合葬之誌題不書婦王荊公文云江陵縣有合葬

龍山之西者爲宋龍川令贈某官王公之墓旣云合葬其下
乃止書其夫姓此其尤大彰明較著者也今云暨配某者無
論唐宋卽明初諸家文集皆無之所以前輩直斥爲不典之
詞汪氏前二刻皆未免循沿陋例今宜削去至於紀事之文
特取其異者書之如孔戡止書其佐廬從史一事王適負奇
兼書其謾婦一事李虛中書其深五行苗蕃則書其死後
之困歐公爲師
魯詩亦然若李干則專書其服食一事並世系亦不書
歐公誌薛質夫直云簡肅之後於是而絕其下止就無後發
揮此爲真得昌黎之髓者其實此法不始韓歐史公世家列
傳皆然衛世家叙前後八百年事專用二子乘舟一詩首尾
提唱便爾烟濤無際涵存杜門謝客是其最異之事入首卽
與揭明後雖兼叙他事仍須與此事隱約相關此韓歐一定

之法近人好爲籠統之語不求精切以至濫瀾滿紙鄙文誠陋其不及古人者不能櫟括爲精妙語或結響鍊字尙可推敲竊欲得一二言教示更削爲幸若其命意裁局自謂無慙於古歐公與梅聖俞書論陳碑必不可增謂碑中有兩三處是行狀所無若果有當書何故而略切須丁寯論之鄙文所誌亦有行述所不載者足以知其竭智盡忠於此足慰孝子無窮之思矣然誌文難作每一篇出人得施其議論以歐公之學識才力施諸范尹二賢當時猶且曉曉不已何況鄙文歐與徐無黨書云必欲更換請別命他人作僕亦云然蓋作者身在局中其營構之苦不能一一爲他人道也

與蘭泉先生書

王芑孫

芑孫以亡弟葬事久在吳門比還華亭始得讀朔日教墨具

審起居康勝湏事別有商量甚慰懸仰承撰亡弟墓表叙事
詳密其行文寓激宕於春容寬博之中讀之感涕誼當泥首
階前以拜大賜緣久出乍還暫遲報謝先此手啟以布區區
文中贈縣丞等小誤及點易一二處皆有義今寫上一本願
依此入集爲他時傳信之資幸甚示及墓表結銜在後語合
諸昔賢文集類皆如是自必古人曾有此例惟石刻在今者
神道碑至多而墓表罕見其神道碑書撰人名仍在前三行
二行顏魯公所書諸碑可覆按也古人以墓東南爲神道南
雷黃氏以神道墓表爲一物旣名異而實同似亦分條而共
貫在前在後各由所便 國家格令墓碑製度修短遞殊今
亡弟墓小限於地而贈階五品依古之制則不能適立於東
南就今法則其石未免稍殺功令貴得同賤賤不得同貴故

石從其殺但石既不豐文逾千字書者窘於邊幅故用來指結銜在後之例雖用此例而私心實未敢謂神道碑結銜在前墓表決在後其題額則曰賜葬王君墓表亦古別製四字之例此但因時起義取便於事於古於今實無援據質之高明未審以爲何如

與彭允初書

王芑孫

出門來阻凍阻澗盤桓中塗今年六月始達京師七月之塞上一視舍弟歸而杜門通州通州無一人相識婦家擇賤薪菜處寓孥焉以故芑孫亦隨輩而在今現在通也長安道上出無僕馬衣服容貌不如人而徒用文字干謁人率用爲笑其於文字又不幸素有能名指摘所萃難以自全亦遂裹足不入蕭然逆族中士鏗菜罌雜在其旁朝夕百需一切無有

間亦執卷吟諷清坐如在家時也然困中嚮學之志益切念
聖賢之業莫不自收放心始而已放之心非有憂患鞬挫以
痛迫之則心有所著而不肯歸其於愼獨工夫不周密而設
誠制行之力必有敗於倉猝以自欺而不及知者古者養德
之方上者養之以良師益友下者養之以佩玉琴瑟鸞和之
物天其或者玉我於成賜之以良師益友如先生者而又賜
之憂患困苦以範制拘防爲我佩玉琴瑟鸞和之助乎居常
以此默默自約其身心十丈塵中無與爲質蓋自出門至今
幾一年其間無一日而忘先生也辱命爲先尚書墓碑所不
敢辭惟來書稱引過當非所宜承今稍本韓歐王三家義法
爲之寄去但不能真爲伯喈之文如先生所責望如何如何
外碑例當略於幽銘而秋士作妄謂太略故加詳焉古碑版

文雖甚簡核必有所獨詳之處凡所謂略者從其所詳而略之也無統攝數言而一概略之之理亦無志大臣葬而不書官簿者使後人讀之莫知進退首尾歐陽公常以金石文考正史傳使皆如此則如何而可以考正耶韓之誌子厚紹述皇甫之誌韓皆頗略矣而獨詳於其爲文所謂言有序各有當惟其是者此也卽介甫於文律至謹亦無置事蹟而統攝數言之事昌黎作胡夏公外碑最簡核要其簡核固不在事迹外歐與王卽已沛然不能自止矣伯喈之爲太邱韓之爲貞曜先生歐之爲徂徠先生胡先生皆置官事不書而其所謂詳者具在若用以施之大官又非其體也叙事之文蓋始於尙書其統攝數言之體蓋始於堯典舜典曰放勳曰重華協於帝後之爲統攝數言有如是簡核者乎而堯典不能不

叙授時釐工師錫三大事中間其工驩兜及續用弗成之語
無所不叙釐降觀刑瑣瑣及兒女子事何如其詳也納揆
受終巡守肇州象刑咨岳亮功登庸件繫者大事八九而餘
事之旁見其中又六七焉中間年歲日月或先書或補書何
如其詳也不如是則所謂重華協於帝者不信也堯典舜
典如此其詳不過數百言遷固之爲本紀世家列傳動輒萬
言何也文章天地精氣之作而爲聲者也世益降人心危而
道心微精衰氣薄綱紐不張中聲之墜久矣其辭益不能以
自舉其言益不可以信後不能自舉而又不可以不信於後
于是章證事迹歎泄無已此亦不得已之心與無如何之勢
聖賢與庸衆不能異而卽爲天地精氣之所存不容以繁簡
論矣居今日而立言但宜時存此意以按之漢以來文章之

徒課其離合不得矯枉而過正也古文之法亡於冗筆而矯枉者亦與有責輒復論之然秋士作筆力殊絕不失爲唐雜家文聞已物故甚可悼念且不及聞此論殊可惜也漸涼已出關否雖爲道勿太急切芭孫夫婦皆健亦時時病不爲大害流離中生子冀其男也乃又得女足知困中無事不謬破牕油燈伸牘書此語刺刺不可竟風沙滿硯池亦遂不復竟也

寄孫楚池師書

盧文弨

日承手示論近今人士學不如古者有二弊一則貧窶所累不能不以衣食分其志一則爲學使者不能衡鑑惟允取通經學古者以風示之夫士也旣處不能專精之勢而所以應上之求者又可以幸而得之此所以績學能文之士蓋千百

人中庶幾一二而猶未可必也茲言可謂切中近時之弊夫
伊古以來士之能自立垂名聲於後者惟貧士爲獨多其當
大任而著勲績者尙已卽以文士中求之傭賃樵牧織簾鬻
畚然荻照雪聚螢抱犬者比比而是安在貧之不可以益厲
所學耶竊謂近今之弊尤在乎志節之不立風操之不振故
中材以下以貧爲病而墮其守者有之矣蓋不獨役役焉惟
治生之是急也亦由上之人不能貴士而遇之以禮偶有微
忤輒欲借之以立威而摧折之唯恐其不至于是士之自處
也亦日賤所憂不徒在學之不專文之不工而已旣不知學
則益不知古聖賢之志節而冥冥以行不得志猶未甚害也
使其得志其害可勝言哉至於學使者之於士未能如古者
教之之法也所衡者文而已而文實可以見學學非徒記博

而誦多也理則昭昭然法則秩秩然其辭氣溫溫然浩浩然
皆不可以襲而取也今父兄之望其子弟鮮不務爲速化之
術矣然以其文與老成積學者較蓋如朱紫玉石之不可以
雜糅也乃或貴紫而賤朱寶珉而弃玉速化者有效而積學
者無功嗚呼於此有人焉廼後生以窮經研理之事鮮不以
爲迂矣更抗之以聖賢誠正修齊之法則卻行而退耳其弊
蓋非一朝夕之故也若文弼所業則在雞鳴之三章矣在鍾
山幾五載幸有一二同志信而從焉至於漸染俗學已深者
殆終不能變也始文弼初至時肄業者百數十人今則倍之
矣每課必卷卷而評校之但苦年力漸衰精力不及而實不
敢以慢易處之是以幸免於愛憎之口每思人當中年以上
讀書實難唯童髫穎秀者可教之以五經爲根柢庶有異於

俗學之陋而不貽終身之悔恨與前學使者言之因選得四
五人皆年十四五新入學者送院受業每月定期考校者六
次爲之析疑陳義且察其成誦以否而究竟能副所期者絕
少雖至今羈縻弗絕然窺其意念似終不苦時文之可悅高
者亦不過詣聲屬對爲詩賦之用而已所謂學者如牛毛成
者如麟角不信然乎文昭家貧惟仰束脩所入故不能辭講
席而不居然亦非徒食也所梓書院諸生課義二冊呈覽其
於吾師公正論文之旨未知有合焉否耶

與是仲明書

戴震

僕所爲七經補傳未嘗敢以聞於人恐聞之而驚顧狂惑者
衆昨遇名賢枉駕望德盛之容令人整肅不待加以誨語也
又欲觀末學所事得失僕敢以詩補傳序並辨鄭衛之音一條

呈覽今程某奉其師命來取詩補傳僕此書尙俟改正未可
遽進請進一二言惟名賢教之僕自少時家貧不獲親師聞
聖人之中有孔子者定詩書禮樂春秋易傳示後之人求其
一經啟而讀之茫茫然無覺尋思之久計於心曰經之至者
道也所以明道者其辭也所以成辭者字也繇字以通其辭
繇辭以通其道必有漸求所謂字考諸衆書得漢許叔重說
文解字十五卷三年知其節目漸觀古聖人制作本始又疑
許氏於詁訓未能賅備乃取爾雅方言漢儒箋注之存者及
其散逸寄見他書搜求得之用溯漢初經師授受欲絕未絕
之傳於是知一字之義當貫羣經本六書然後爲定至如經
之難明尙有若干事誦堯典數行至乃命羲和不知恒星七
政所以運行則掩卷不能卒業誦周南召南自關雎而往不

知古音徒強以協韻則已齟齬失讀誦古禮經先士冠禮不知古者宮室衣服等制則迷於其方莫辨其用不知古今地名沿革則禹貢職方山鎮川澤春秋列國疆域會盟攻戰之地失其處所不綜古今推步之長則如夏書之辰不集於房魯太史引以爲正陽之月孟夏東晉古文尙書繫之季秋繫之仲康肇位四海小雅十月之交鄭康成以爲周正十月朔原甫以爲夏正十月春秋傳兩記日南至歷代史至載步算家上考曲合其一而卒違其一儒者何以識古書之眞僞辨箋解之得失決魯秣至朔之當否不知少廣旁要則考工之器不能因文而推其制不知鳥獸蟲魚草木之名號狀類則比興之意乖而字學詁訓音聲未始相離聲與音又經緯衡從宜辨漢末孫叔然叔立翻語厥後考經論韻悉用之晉人

以譯西域釋氏之言釋氏之徒羣習其法因竊爲已有謂來自西域儒者數典不能記憶也中土則天用句股今西人易名三角八綫其三角卽句股八綫卽綴術然而三角之法窮必以句股御之用知句股者法之至備名之至當者也管子言五聲十二律宮位乎中黃鍾之宮四寸五分爲起律之本學者蔽於鍾律失傳之後不追溯未失傳之先宜乎說之多鑿也凡經之所以難明若干事不宜忽置不講僕欲究其本始爲之又十年漸於經有所會通於是知聖人之道如縣繩樹臬豪釐不可有差僕聞事於經學蓋有三難淹博難識斷難精審難三者僕誠不足與於其間其私自持暨爲書之大致端在乎是前人之博聞強識如鄭漁仲楊用修諸君子著書滿家淹博有之精審未也別有略是而謂大道可以徑至

者如宋之陸明之陳王廢講習討論之學假所謂尊德性以美其名然舍夫道問學則惡可命之尊德性乎未得爲中正可知羣經六藝之未達知學之士所耻用是戒其頽惰偶有察知特懼忘矢筆之於書識見稍定敬進於前不晚名賢幸諒

答友人某論文書

袁 桖

人必有所不能也而後有所能世之無所不能者世之一無所能者也
和之弓垂之矢非古之能者乎垂非不能爲弓和
非不能爲矢也然而可傳者一人一物而已也
伯夷典禮則棄樂孔子學射則舍御分爲四科判爲六藝不以其所能者
傲人不以其所不能者病已
泰學不兼方漢亦然宋以後人
心不古喜多爲之沿其流而不溯其源夫是故雖能之而墜

夫不能者亦無以異也僕不敢自知天性所長而頗自知天性所短若箋註若歷律若星經地志若詞曲家言非吾能者決意絕之猶恨其多愛而少棄也學杜韓亦爲元白好韓柳亦爲徐庾汲汲顧影如恐不及方欲捐兩鵝以求其精而不謂足下之就其病而深之也足下來教曰詩不如文文不如著書人必兼數者而後傳此悞也夫藝苟精雖承蜩畫筴亦傳藝苟不精雖兵農禮樂亦不傳傳不傳以實求不以名取安在其兼不兼也然僕意以爲專則精精則傳兼則不精不精則不傳與足下異矣若謂詩文不如著書僕更不謂然周秦以來作詩文者無萬數誠如尊言矣著書者亦無萬數足下獨未知之乎擷藝文志未必文集俱亡而著書獨在也僕疑足下於詩文之甘苦尙未深歷故覺與我爭名者在在皆是而獨震於著書者乎

駁以爲其傳較可必耶又疑詩文之格調氣韻可一望而知而著書之利病非搜輯萬卷不能得其癥結故足下渺視乎其所以知者而震驚乎其所未知者耶要知爲詩人爲文人談何容易入文苑入儒林足下亦宜早自擇寧從一而深造毋泛涉而兩失也嗟乎士君子意見不宜落第二義足下好著書僕好詩文此豈第一義哉古之人其傳也非能爲傳也乃不能爲不傳也何也使人謀傳我則易而我自謀其傳則難也僕與足下生盛世不能爲國家立萬里功活百姓又不能伏丹墀侃侃論天下事并不能爲游徼嗇夫使鄉里敬之信之而乃欲爭名於蠹簡中狹矣然僕竊喜自負者王荊公云徒說經而已者必不能說經僕固非徒爲詩文者也或與夫足下所引終身著書諸人其容有間乎

卷四
答友人論文第二書

袁枚

客冬蒙示古文七篇讀畢思有所獻替忽忽少暇入春以來歸妹於揚州筮曰賓婚勞不可支比來稍閒敢自所懷以諍足下竊爲足下之爲古文是也足下之論古文非也足下之言曰古文之途甚廣不得不貪多務博以求之此未爲知古文也夫古文者途之至狹者也唐以前無古文之名自韓柳諸公出懼文之不古而古文始名是古文者別今文而言之也劃今之界不嚴則學古之詞不類韓則曰非三代兩漢之書不觀柳則曰懼其昧沒而禠也廉之欲其節二公者當漢晉之後其百家諸子未甚放紛猶且懼染於時今百家回冗又復作時藝七科名如康崑崙彈琵琶人染淫俗非數十年不近樂器不能得正聲也深思而慎取之猶慮勿暇而乃狂

於龐襍以自淆過矣蓋嘗論之古書逾少文逾古後書逾多
文逾不古商書渾渾爾夏書噩噩爾作詩者不知有易作易
者不知有詩下此左穀以序事勝屈宋以賦詞勝莊列以論
辨勝賈董以對策勝就一古文之中猶不肯合數家爲一家
以累其樸茂之氣專精之神此豈其才力有所不足而歲月
有所偏短哉荀子曰不獨則不誠不誠則不形天下事不徒
文章然也鄭康成以禮解詩故其說拘元次山好子書故其
文碎蘇長公通禪理故其文蕩之數公者皆抱萬夫之稟者
也偶有所襍其弊立見而況其下焉者乎今將登騷壇樹旗
幟召海內方聞綴學之徒而談論角逐以震耀乎口耳此非
煩稱博引不可也邯鄲淳之見東阿王李錯之遇梁武帝是
也若夫傳一篇之工成一集之美閉戶覃思不蹈襲前人一

字而卓然爲行遠計此其道誠不在是矣足下擅鹽莢名居淮南之四衝四方之士于于焉來請謁者或經或史或詩或文或性理或經濟或蟲魚箋註或陰陽星厯醫卜日呈其伎於左右足下不涉獵而遍覽焉幾惜乎爲酬應而又以好賢之心好勝之氣日習於諸往來者之咻染不覺耳目心胷常欲觀五都而遊武庫然借此多聞多見使人一談論一晉接驚而詫於四方曰名士名士則可也竟從此以求古文之真而拒專門者之諫則不可也足下之答綿莊曰散文多適用駢體多無用文選不足學此又誤也夫高文典冊用相如飛書羽檄用枚皐文章家各適其用若以經世而論則紙上陳言均爲無用古之文不知所謂散與駢也尙書曰欽明文思安安此散也而賓於四門納於大麓非其駢焉者乎易曰潛

龍勿用此散也而體仁足以長人嘉會足以合禮非其駢焉者乎安得以其散者爲有用而駢者爲無用也足下云云蓋震於昌黎起八代之衰一語而不知八代固未嘗衰也何也文章之道如夏殷周之立法窮則變變則通西京渾古至東京而漸漓一二文人不得不以奇數之窮通偶數之變及其靡曼已甚豪傑代雄則又不屑雷同而必挽氣運以中興之徐庾韓柳亦如禹稷顏子易地則皆然者也然韓柳亦自知其難故鏤肝鉢腎爲奧博無涯渌或一兩字爲句或數十字爲句拗之練之錯落之以求合乎古人但知其憂憂獨造而不知其功苦其勢危也誤於不善學者而一瀉無餘蓋其詞駢則徵典隸事勢難不讀書其詞散則言之無物亦足支持句讀吾嘗謂韓柳爲文中五霸者此也然韓柳琢句時有六

朝餘習皆宋人之所不屑爲也惟其不屑爲遂不能爲而古之道終焉且賢者之大患在乎有意立功名而文人之大患在乎有心爲關係古之聖人兵農禮樂工虞水火以至贊周易修春秋豈皆沾沾自喜哉時至者爲之耳若欲冒天下難成之功必將爲深源之北征安石之新法欲著古今不朽之書必將召崔浩刊史之灾熙寧僞學之禁今天下文明久已聖道昌而異端息矣而於此有人焉褒衣大袂猶以孟軻韓愈自居世之人有不怪而嗤之者乎夫物相禰謂之文布帛菽粟文也珠玉錦繡亦文也其他濃雲震雷奇木怪石皆文也足下必以適用爲貴將使天地之大化工之巧其專生布帛菽粟乎抑能便有用之布帛菽粟貴於無用之珠玉錦繡乎人之一身耳目有用鬚眉無用足下其能存耳目而去鬚

眉乎是亦不達於理矣韓退之晚列朝參朝廷有大著作多出其手如淮西碑順宗實錄等書以爲有絕大關係故傳之不衰而何以柳州一老窮兀困悴僅形容一石之奇一壑之幽偶作天說諸篇又多譎詭悖傲而不與經合然其名卒與韓峙而韓且推之畏之者何哉文之佳惡實不係乎有用與無用也卽足下論文如射之有志可謂識所取舍者矣而何以每見足下於莊屈之荒唐則愛之而誦之於程朱之語錄則尊之而遠之豈足下之行與言違哉蓋以理論則語錄爲精以文論則莊屈爲妙足下所愛在文而不在理則持論雖正有時而嗒然自忘若夫比事之科條薪米之襍記其有用更百倍於古文矣而足下不一肄業及之者何也三代後聖人不生文之與道離也久矣然文人學士必有所挾持以占

地步故一則曰明道再則曰明道直是文章家習氣如此而推究作者之心都是道其所道未必果文王周公孔子之道也夫道若大路然亦非待文章而后明者也仁義之人其言諄如則又不求合而合者若矜矜然認講章語爲真諦而時時作學究塾師之狀則持論必庸而下筆多滯將終其身得人之得而不自得其得矣竊爲足下憂之綿莊文多說經絕不類選體而以之勗足下者彼見足下筆氣近弱不宜散文故以六朝綿麗之體進非得已也足下不善用其短而拒之過堅僕愛足下過於綿莊安得不再爲忠告

與袁子才先輩論小倉山房文集書

彭紹升

往承下顧隅持倉猝未罄所懷去年聞選勝包山還寓吳閶者兼旬隨唐氏敬問起居而行旌已發悵然而返大集叙

事文腹笥既富摹繪極工其獨到處驚風雨泣鬼神不足喻也顧其間傳聞互異多有淆訛敢據所知畧陳一二惟垂聽而察焉案八旂通志姚啟聖傳載姚康熙二年中漢軍榜弟一授香山知縣八年坐事革職十三年耿精忠反始募鄉兵赴康親王軍今集中謂姚到官日釋諸前官之被繫者令與興祚說康親王檄召赴軍以十年間事并爲一時誤也又志載施琅以順治初歸旂康熙二年累官至水師提督並非姚所奏署後朝議息兵召還亦並無疑琅之心至澎湖之戰制三軍之命者惟琅姚但駐守廈門調遣資糧而已今云施漂泊海上姚率大軍救之恐非事實以旂志及榕邨文集臺灣紀略參之得失可見未稔集中所據者何書也至吳三桂以康熙十二年反明年耿精忠反十五年尙之信反集中屢

書三藩反并爲十三年事又誤也張楷傳載張在安徽以議
寬積欠案獲咎硃批諭旨及督撫年表張在雍正中無巡
撫安徽事又言調撫江西以虧倉穀解任聽勘亦誤此是裴
率度事張嘗爲江西布政矣亦未嘗爲巡撫也陳恪勤傳載
陳下江甯獄時趙恭毅巡撫浙江過江甯傳諭旨亦誤趙
以康熙四十一年授浙江巡撫其冬調偏沅陳坐法在四十
四年其後再罷職又在四十九年趙尙未去偏沅也沈光祿
狀東巡在乾隆八年是巡盛京非山東胡恪靖祭告南
鎮非南岳南鎮者會稽也此上所陳皆顯然可見者其它瑣
悉或未易枚舉惟望悉心攷核隨手更定俾豪髮無憾而後
卽安庶可爲傳世行遠之計不然與爲失實毋寧闕疑此則
私心所深禱者也抑凡古人碑誌之作未有不俟其子孫之

陳乞而漫然爲之者漫然而爲之則吾言旣置之於無所用
又無子孫爲之徵則其人之本末不具而徒采道路之傳聞
剽摭紳之餘論或援甲以當乙或取李而代桃傳之異日真
僞雜揉是非瞽亂不如舉而刪之爲得計也愚意大集諸碑
誌非有子孫陳乞者削之其事詞可徵本末具者或爲傳或
爲狀可也不具者或別爲書事亦可也誠如此在作者旣不
至失言而諸公平生行事亦得藉以取信於後世其與夫漫
然爲之者大不侔矣執事以爲然否幸進而教之

與馮星寶鴻臚書

錢大昕

執事注蘇文忠公詩正王施查三家之誤而補其漏略可謂
豪髮無遺憾矣施氏元本春帖子在端午帖子之後查本始
易其次以僕攷之兩帖子皆元祐三年所進是年閏在十二

月諺所云一歲兩頭春者也其正月己酉朔據子由元日宿齋詩今歲初辛日正三明朝風氣漸東南還家強作銀幡會雪底蒿芹欲滿籃是正月三日辛亥祈穀四日壬子立春也公於時已差禮部知貢舉例當鎖院故不及供帖子其閏十二月十五日丁巳爲己巳歲之立春節公次韻劉貢父春日賜幡勝詩有臘雪強飛纔到地之句此立春在臘月之證也任注元祐三年戊辰作正謂此詩作於戊辰臘月非謂戊辰之春也施氏編此詩於戊辰歲本無差誤查氏強作解事移此詩於己巳卷首并將春帖子移於端午之前則眞誤矣劉貢父集中題云呈子瞻沖元內翰子開器資舍人執事據許將傳知成都府元祐三年再爲翰林學士謂將於三年方旋京未必立春時卽在朝疑任注有誤僕攷東坡內制集有元

祐三年四月十九日宣詔許內翰入院口宣是則正月立春
許固未在朝列若閏十二月立春正與坡公同直任注本無
誤也年譜先生生於景祐丙子十二月十九日不見干支執
事亦疑而未決僕以遼志朔政證之是年十二月實乙巳朔
則公生日當爲癸亥施元之以爲壬戌者殊未足信伏惟詳
察

湖海文傳卷四十四

湖海文傳卷四十五

青浦王昶德甫輯

書

上徐大司空論從祀書

汪由敦

前者伏讀

皇上詣學聖諭命議孔廟從祀諸賢有先罷而今宜復者有舊缺而今宜增者表章儒先昌明正學惟盛世有此盛典然採擇明備以仰副

聖天子加意道術之至意則實有望於主持風教之君子焉竊嘗考之漢儒馬鄭諸子昔人以其有功經學從祀有年矣有明中葉有起而議其人者於是黜戴聖劉向賈逵馬融何休王肅王弼杜預八人而鄭眾盧植鄭康成服虔范甯五人

改祀於鄉夫馬融王肅諸人罪有大小然指其過而黜之不
爲無因五人者何罪哉孔孟不傳之絕學至宋而後大明漢
儒不足以窺其奧然於諸子百家淆辭雜出之時而獨抱遺
經固已聖人之徒矣至論其爲人則鄭眾奉使不辱史稱其
在位清正盧植抗董卓追少帝忠節凜然鄭康成著述尤盛
至使黃巾下拜亦豈萎萎小儒云爾哉乃以尊宋儒而盡絀
漢儒其見不無少偏已黜而當議復者此五人是也至舊缺
而今宜增者則若有勉齋黃氏榦朱子弟子中第一人道脈
家嫡也其所詣可前繼羅劉後媲蔡真與程門龜山相埒而
從來無議及之者誠爲闕典明儒如正學先生方氏自幼卽
有志聖賢及其立朝銳然欲行王道興太平臨難授節合於
殺身成仁之義人但知其能死忠耳不知先生不惟一死之

爲烈也讀其遺集一言一動必以聖賢爲準於聖人之道實能身踐而力行之設居平世獲考終其文章必能追配昌黎其事業必不亞司馬文正况大節卓著視仲子之結纓爲有光焉正

聖諭所謂扶樹名教人也俎豆廟庭實爲允當又如王文恪公潛心理學根柢六經集中著作皆與儒先相表裡顧因時文名重反爲所掩夫先生制舉之文字字闡發精義雖程朱復生必許其爲經傳羽翼而人品相業俱有古大臣風晚忤劉瑾未及年而致政竊謂公文章品望足配廬陵允宜一體從祀本朝則有若湯潛菴陸稼書李文貞諸公皆當從祀以爲昭代理學之倡或疑潛菴近於陽明之學然先生第不攻陽明而已非專爲其說者也且陽明固已從祀矣文

貞之學術信之者半毀之者亦半久而論定或姑以俟之異
日第聖世難逢盛典尤不數觀自嘉靖釐定至今幾二
百年方值今日聞風者所爲不能已於惓惓之懷也夫廟
堂閎議非愚賤所敢及然誦詩讀書景行素切適逢釐定之
時而以相質於知己之前不爲好事且閣下以名賢秉軸有
總持公論之任不可不垂意採擇總憲朱公當代偉人司農
張公文章宗匠在班行實主斯議雖蒙顧睠未敢冒瀆或閣
下於聯袂接履之時舉以相證亦夫儒先生畱心理學者所
樂道而正人鉅公所樂聞也不勝幸甚

答門生王禮圻問作令書

袁枚

書來問作令之道甚勤且摯僕老矣隱空山十年向所行爲
不復省記然澌澌病馬久不知鞍轡爲何物或放而前之俾

引其生平經歷之處則雖龍駒乘黃未之或先也夫吏治有不
可學者有可學者天之生才敏鈍各異或應機立決或再三思
而後決或臥而理或戴星出入而後理此豈可學哉然行政之
方與安吏民之道則循吏不同同歸於治今以縣令所當知與
僕行之而有效且與才性無關者爲足下告焉夫治民者州縣
之職也然治民不自民始胥吏者官民交接之樞紐也家丁戚
友又胥吏交接之樞紐也不治胥吏不能治民不治家丁戚友
不能治胥吏治家丁戚友胥吏奈何曰用之而勿爲所用是已
其用之而勿爲所用奈何曰通之而勿隔是以官與吏終日見
而無勞家人之轉通官與民又終日見而不許胥吏壅遏則彼
胥吏家丁戚友者不過供奔走佐使之職而已而何弊之能爲
且夫用戚友不如用家丁用家丁不如用胥吏用胥吏不如用

百姓戚友果賢何所不可如其不肯法難遽加若家丁則利在前法在後矣然家丁之來去無常胥吏之曹缺永在其畏法媚官甚於家丁較可用也胥吏之職大都拘人集眾若受訟時朱書牒尾卽令某甲喚某乙甯不省需索而免稽遲乎是百姓尤可用也吾不解今之爲政者一則曰嚴胥吏再則曰嚴胥吏夫胥吏卽百姓也非鬼蜮禽獸也使果皆鬼蜮禽獸宜早誅之絕之而又何必用之而嚴之周官所謂陳其殷置其輔輔卽胥吏也雖聖人不能不用也然三代上有庶人在官之祿今旣無之則上之人宜爲若作設身想而何嚴之爲彼嚴者豈不曰胥吏舞文乎病百姓乎夫使之舞文病百姓者官也非胥吏也試問已舞之文判行者誰耶加印者誰耶彼舞而我亦隨而舞之不自責而責人何也胥之權在行

檄役之權在奉檄今之縣令檄行若干不知檄書云何不知
某當理不知某當銷又不知如是而欲除弊雖日殺百胥吏
無益也夫欲大權在我莫如手記而手銷之以州縣之繁而
謂事必親記似屬奢闊之論不知訟牒極多每日所進能過
百紙乎百紙中其理者能過十事乎每日記十事未爲難也
次日再收百紙大半覆詞訴詞其應記者又減十而得五矣
受牒十日書所記而召之訊訊吏何以不行檄則吏窮訊役
何以不集犯則役窮窮則免冠謝罪請嗣後十日內行檄集
犯永爲例矣檄行犯集隨判而隨銷之任胥役之需索姦匪
之侮張而不出十日之期則所費有限枝節不多其初情未
改訊斷亦易彼百姓者知十日之必結也又何畏乎吏役而
賄之法立半年可十月中竟無一事此胥役之所大懼也然

民不告賦上不訪吏有提吾胥吏者官自當之不許胥吏索百姓之錢亦不許上官胥吏索吾胥吏之錢彼胥吏者不懼於始而感於終乎康誥曰要囚服念五六日至於旬時非速結之義乎夫可以探喜怒轉關鍵者胥稟也有減增有株引者檄稿也有移換有竄入者供詞也有暗阻有明催忽早忽遲者訊期也吾一切目覽而親裁之許一檄不許重檄檄中人數空之而待親裁差某役亦空之而待親裁內銷外結檄焚卷撤彼胥吏何權焉于胥吏又何誅焉今之州縣非不勤也所惜者精神在上而不在下耳不知上行不答則嚴飭至內幕外胥俱能相促惟夫寡妻弱子鄉民村戶不遠百里而來榮汝之糧望官如望歲而又無門探刺不爲之結于浹日以内吾心安乎政綱既舉首清刑罰清之云者非寬減之謂

得當之謂也。皋陶曰：「罪疑惟輕，言罪之疑，輕之其不疑者不輕也。」孟子曰：「省刑罰，言省察之不使刑罰繁也。」蓋刑以戒惡也。刑繁則不足以懲惡而轉生刑之惡，以爲吾旣已受刑而無所損矣。尙何懼哉！以此午痕瘡而逞毒淫者，比比焉。要知刑具而部頒之亦無庸也。夫物之不齊，物之情也。彼衣冠辱民，加細刑而呼號不勝何事？于部頒之具，積蠹大猾，其筋骨皆習練之餘，當巨梃而含笑，囊三木而無聲，何畏乎部頒之具？吾以爲其畏刑者，雖應笞亦宜寬省，以洒其耻。其玩刑者，法止杖四十而吾以二十當之，其酷則更甚于四十。使彼知二十之委頓如此也，況四十耶？乃凜凜乎懼心生而惡念除矣。凡判尾必親書，讞非炫才也。以日後展卷而了然也。判事必坐堂皇，非矜眾也。以觀國人之顏色，而是非使共見也。勿

輕置人于獄非徒仁也所以清狴犴而防襍處之不虞也勿輕申詳非專擅也所以免捉搦而成難結之案也勿問坐獄者之貧富恐有成見而悞大公也勿故反聽請者之勾求恐事未可知而矯枉過正也勿勸捐以安富恐抑勒者多勿罰鍰以遠嫌恐徇財者惑勿交鎖鍊于胥役必內存之當用者加朱墨圍使不得開不當用者不署鎖字使不得混勿委監獄于典史必驟臨之審其輕重辨木索之有無察其氣色知衣糧之尅扣孔子曰聽訟吾猶人也必也使無訟乎此聖人甚言無訟之難非言聽訟之易也今之人不能聽訟先求無訟不過嚴狀式誅訟師訴之而不知號之而不理曰吾以息訟云爾此如防川怨氣不伸訟必愈多不知使無訟之道卽在聽訟之中當機立決大畏民志民何訟耶所謂側弁圻顔

則不投于明鏡是也然而一閱之獄情僞萬出或在案中或在案外聽之者恃才恃氣恃廉恃公皆不足以聽也虛以受之靈以應之周詳以求之旁見側出以察之庶足以聽也大凡事過而嘗自悔其誤者其誤常少此所謂政如農功日夜思之者也事過而嘗自信無一事之誤者其誤必多此所謂氣矜之隆秦人視越人之肥瘠者也對簿之民宜分爲六重者獄其次繫其次管守其次保釋其次待喚其次聽其所之數者能臨事料量而不容胥吏持之則聽訟之道思過半矣和息非不可允但須書明曲直以防日後之終凶狎邪非不當嚴但須戚屬投明不許匪人之恫喝律設大法而通融者存乎人否則傀儡而已案無確據而闕疑者法乎史否則武斷而已觀漢江充之巫蠱而知賊之可裁也觀南史傅炎之

斷獄而知凶器之難據也天性之情粲而不殊雖父訴子亦使自答否則傷慈愛矣墾田之事勘而後斷雖風霜寒暑不可辭勞且借之以巡鄉村矣刑名之外則有錢穀錢穀役侵者多民負者少比役無益也役又借比以索民錢善催科者不輕比役但擇其負多者召花名戶而欲見之吾未見真花戶來而稅不登者也慮飛洒則細刊科則昭示鄉民防重耗則突取衡平辜較一二漕無抑勒則浮取皆恩糶果應時則盈虛有備所謂催科中寓撫字也百姓之上尙有紳士凡今之閉門塞竇而不見客者其中所不足也古人于邑中有鄉先生鄉大夫歲時伏臘飲酒習射當其時豈有苞苴竿牘之嫌乎作吏者日對里魁伍伯而不親賢士大夫不特天闕下情亦自覺不雅記有之曰貴貴爲其近于君尊縉紳卽所以

尊朝廷其他生童皆吾子弟亦宜月課季試以無失黨庠術
序之義漢吳公治行號第一而史只載其薦賈生一事此其
故可思也總而論之爲政在外尤須爲政在心心正則羣邪
消心和則眾善集心周於庶務而法令不必苛煩也心淡于
榮祿而上官無所挾持也大府一過而廉從之誅求無厭知
我之巡鄉亦猶是也崇轍一入而守候之飢渴無時知民之
望我不甚殊也威可使人畏不可使人恨恩可使人感不可
使人狎廉不自知者廉之真公不自恃者公之大民信則順
風而呼吏服則指臂可用告示爲吾之仁言不必輕發而發
必手書訪聞非政之大體行或偶然而行必真確求心安不
求名重察物議並察邇言仁無術而不行政師古而毋泥吾
之所行者在是矣吾之所能言者亦止於是矣若夫神而明

之化而裁之則在吾子矣

上慧方伯書

喬光烈

回民本西域種族雜入中國散居秦地雖沐王化特性與
人殊其飲食衣冠婚姻時節若所奉神祇一守其故俗尤善
姦利敢於爲惡縱官府得治之然急則易訐而少弛又易恣
其在渭南者具有田廬且託業鄠市其與土著之民情睽視
異兩不相下欲遣去之勢所不能任而處之又切隱患往者
待之等於羈縻未嘗思所以變而化之之術嘗觀古人守交
州日南皆蠻夷地爲設學興教以柔馴之獷野夙成者咸知
向學久皆順義夫回民雖驚黠亦猶人耳今年七月請於大
中丞爲回民設學館七處招其子弟捐給膏火欲使聞聖人
之教知詩書之旨悟本俗之非慕華風之美竊謂列縣回民

多有以此推行之啟其顓蒙誘其知覺奇邪驚異一旦更易
皆吾良民然此不可_以期必需以歲月漸臻成事所爲有徐
以觀變化之人者此也

上撫軍書

秦瀛

瀛謹上書閣下比以海洋多盜劫掠運閩米船重勞閣下駐
節台州躬親督捕甚憫濱海百姓之望瀛竊惟米船之劫掠
由於海洋之不靖而海洋之不靖實由於武備之廢弛浙省
設立黃巖定海溫州三鎮水師兵不爲少於戰船之外新設
緝匪各船足供駕使如果將備平時操演有方遇事爭先奮
勇則運閩米船經由洋面一遇盜匪所有巡哨各船自必出
力救護何至紛紛被劫並無一兵一卒乘舟赴援是其畏怯
躲避已可概見迨米船被劫其未出口者俱截留內港業已

多日凡出洋巡哨兵船豈竟毫無聞見乃仍逗遛在洋鎮將等亦並不迅速調令回港協同防護蓋在兵丁不過潛匿島嶼而鎮將等亦漫無紀律呼應不靈卽如甯波郡城道府捐貲購辦緝匪船二十六隻均被弁兵坐去並無一隻來港浙東三郡其緝海而縣者風聲鶴唳輿情洶沸而定海故舟山地孤懸海島雖有重鎮駐守聞僅有兵船八隻似此情形實爲單弱萬一盜匪窺伺妄思登陸其何以備扞禦壯聲援耶幸閣下特令黃巖鎮標巡船四十隻前來策應又以李鉞詹殿擢兩將尙稱能事令其迅赴定海一帶勦捕賊匪聞命之下人心始爲寧帖乃匪船潛住定海之長塗山已閱數日而舟師仍無一人到者伏念盜匪止係烏合之衆其中獷悍不法爲羣盜倡者不過十數人餘皆漳泉民人因歲荒飢不得

食不得已而從盜正襲遂所謂民飢而吏不知恤遂弄兵于
潢池者其軍械亦係一時剽劫未必十分嫻習趁此賊船停
泊官兵乘勢掩捕人人思奮未必不可聚而殲旃夫兵固貴
神速今盜匪逗遛日久其心漸懈乘其懈而并力亟攻尤可
剋期集事若失此機會將來盜船紛紛竄逸欲進勦則遠洋
遼闊風信靡常前明俞大猷黃龍之戰尙不能得之於倭賊
欲緩兵則兵退之後又恐其乘潮踵至更無畏忌是此時賊
之聚於長塗正與我以可乘之機而因循蹉跎日復一日深
可痛恨蓋水師積習牢不可破以選懷爲持重以懼怯爲老
成宜閣下日切焦思而舟師遷延觀望迄無擒獲之效也且
欲制勝必先立威欲立威必先示信所謂信者何亦曰信賞
必罰而已今閣下任節鉞之重務使赤子無愁聲滄海無駭

浪惟當深念海洋滋擾之由獨持定見用命者予重賞不用
命者予厚罰賞罰明而將帥士卒無不用命予以制羣盜之
命無難庶海上無餘鯨之警而濱海百姓胥獲安枕之樂矣
瀛不揣庸昧以素爲閣下所知不敢不竭其區區干冒尊嚴
伏祈鑒察瀛再拜

上石經館總裁書

洪亮吉

亮吉頓首肅啟閣師石經總裁執事昨奉

諭旨辦理石經弁諭以蔣衡所寫進十三經爲底本者鴻
都門側建立百碑務本坊南書從一體雲臺辨難之旨定自
禁中開元御製之篇冠于碑首士生今日千載一時又欣值
執事以上衮之尊嚴領羣經之問答總司秘籍董率羣賢此
則鸞臺鳳閣別標監領之名虎觀麟洲雅重諸儒之選本日

復派亮吉等四人預司其事老聃之守柱下子政之居閣中
自問何人敢同前哲承命之下欣悚交并伏以 聖朝舉重
度越百王況石刻傳流將貽萬古是必博稽羣籍參以昔賢
訂蜀宋之叢殘校漢唐之昔誤其體則括一字二字三字爰
定厥中其字則準大經中經小經傳分其任子思子之言曰
以俟聖人而不惑張伯松之言曰懸諸日月而不刊迨今日
執事及諸君子之任乎若亮吉者與天祿石渠之選已愧非
才掌三王五帝之書尤慚無任竊見兩年之限校讐既有程
期而旬日之間義例仍難畫一此則屢承垂詢之餘私心有
不能已者也又自計于石經一事不爲無緣早從江左之使
車壯人咸秦之節署于學士則贊成其事乾隆三十七年安
肅學政朱筠奏請
立石于侍郎則助校其訛乾隆五十年陝西巡撫畢沅
恭摺唐開成石經進呈實先

儒之廡摩京兆之叢碑從好古之家識熹平之殘字南仲篆書搜于駿學光堯御筆拓自錢唐每有遺文悉歸瀏覽又況書編隸釋仿自先臣閣建蓬萊不無家學今復忝預掌書之任廁身秘閣之中雖識大識小事有不同而盡美盡善期於無負輒不自量謹撰上二十四條各約舉一二事尚祈執事于機務之暇察其愚昧之誠不棄芻蕘賜之采擇義雖難徧而餘庶類推倘可施行乞頒本館

一經注參錯宜正也易序卦履者禮也四字旣誤以經而作注儀禮下言爲世父母二十一字又誤以注而作經左傳上天降災四十二字又并非注而誤作經之類

一前後倒置宜正也穀梁僖二十年釋宋公三字當在外釋不志之上尚書武城王若曰十二字誤移大告武成之下

一脫文宜補也大易童蒙求我中乃脫來論語賜也賢乎下應增我

一又有因數字之脫而上下不貫者宜補也左傳桓十三年洪水二字全脫而亂次以濟之義不明可以證釋文者酈元之注也論語子貢章樂道二字脫一而富而好禮之文不配可以證孔傳者皇侃義疏也

一衍文宜去也易傳坤至柔上衍文言曰三字禮雜記君之母與妻上復衍君之二字之類

一又有因一句之衍而文義不續者宜削也易傳衍變則通三字而德明之本尙可並行禮記衍舞斯愠三字而貢父之編遂生異議

一因一字之別而本義全乖者宜改也儀禮司射實觶之實

誤爲賓而洗升之文難喻左傳旦辟左右之旦誤爲且而厥夢之符不彰

一前後宜畫一也易包字凡十見而苞桑之苞獨从艸孟子飢字凡六見而無饑之饑獨作幾句踐之句並从口而間亦作厶盤桓之磐本作般而又或加石

一偏旁宜急削也暮从二日憾有二心添木爲榭加艸於臧卽且之側从虫胡連之旁置玉此類殊多亦難畢數若本之爲本暴之作暴磷堯之在魯論飴莘之畱孟子更爲別字之尤又屬全文當改

一字有誤自魏晉以前者儀禮則祧初从濯風詩則祧本爲繫大易陰凝叔重尙知其俗春秋禘服當陽已改爲均一字有誤自唐宋以前者若訛爲戲幸有賈逵之注可證說

文選誤爲漣倚非鴻烈之編註明古義此上二端並宜裁定

一字雖非俗而亦當定从本字者如論語後彫之當作凋左傳絺綌之當作紉是也

一同一俗字當酌去其已甚者拖地皆論語繩紃之別字與其从拖不若从陸氏之地爲得濱瀕皆韻之或文與其作濱不若从廣雅之瀕爲是

一經不可改从注也禮記大學篇此之謂自謙鄭康成謙讀作慊而近刻卽改爲慊周禮九嬪贊王杜子春王讀爲玉而各本依改爲玉

一此經有可以彼經改者同一引書則大學篇一个臣之類移从公羊傳作一介爲是

一此經有必不可以彼經改者各存古字則公羊傳鄭伯段之字今改从左傳本作伯堅爲非

一有因上下文而誤者亦當改正左傳襄二十七年諸侯二字以上文而誤重論語子路章輕裘二字因下章而竄改一前代之制宜改也秦并天下舉乃从非漢戒羣臣對初離口著火德之符改从水之洛爲雒表金刀之讖易處者之𪛗爲劉以迄新莽疊疊艾之誤開元頗陂字之訛字苑出而影始从艸書行而脩訛从羽繼之作縵城之作圻匡之作匡桓之作栢之類斷事隔于數朝悉當从平釐正一漢石經有急宜从者子游之爲子序石借之爲石蹟大易先心之文尙書微言之字此類亦多略標一二

一唐石經有宜酌从者尙書禘乃烈祖之烈作厥左傳其氣

歌作炎風詩禮矣不誤从禾論語德衰下仍加也至其失者則于干不辨專車不明此類殊多亦難枚舉

一兩宋石經有可从不可从者南仲號工篆籀之文乃以豐而配禮光堯始準宣和之詔復易陂而作頗

一唐宋石經外刊本宜搜羅也夫毛居正之正誤藉謗監本之訛晁公武之遺書足校石經之失吳興沈氏之刻相臺岳氏之編本畱淳化與閩板以兼行堂號永懷較汲古而稍善此則並可博搜以襄盛舉

一字當以說文爲本而從否亦當斟酌者字書無覲字則覲當从繫傳本作價舊文無晒字則晒當从淳化本作𣦵以及份份之在論語增增之在風詩此急宜从者也至若文馬之爲馮馬戚施之作醜醜不妨存此異文可不改从古

字又況蒔之誤菽麗之从薺均後所誤加不堪依據
一本當以釋文爲據而錄取亦當鑒別者如論語襁負之作
緇負易輦帶之爲輦帶以隋唐之大儒反有愧宋元之監
本又況尙書一冊宋人之補釋爲多周易二經近刻之脫
文不少能無待精識之去畱與碩儒之裁決哉此上凡廿
四條未知有當與否幸有以教之

論導河書

并序

陳黃中

乾隆七年春余佐戎淮陰偕漕帥混同顧公轉漕北上公
日三四過余舟中時詢及治河事余曰公母以河事爲問
也河之受病者深行且大決度公力不足以任之公入見
清問所及如率爾而陳

聖主以此委公殆矣公以爲然六月二十四日抵都時南河

已報決公卽日入對

上果以此詢公公如余指以對旣退輔臣西林鄂公桐城張公錢塘徐公俱造公問治河策公以不知謝翌日鄂徐二公復至意若欲以河事付公者公遜謝如初鄂公默然徐公愠色而去其明日遂有詔直隸總督高公赴江南視河而以吏部尙書溧陽史公攝督直隸余時寓外城混同公造余述其事且曰先生何料之審也時余將南歸省覲赴楚督合河孫公之招而溧陽公忽過余寓力欲邀至保陽余初未識溧陽公且以先許合河兼急欲歸省因婉謝之混同公仍邀余同下見河湖交漲濟甯以下茫無涯涘田廬冢墓靡有孑遺有耳目所不忍聞覩者旣冬月余抵武昌得混同公手書報余以石林再決余以河水方割因

作導河書三篇首述河患之源流中陳疏導之方略而設辭辨難以終其說俟有爲芻蕘之詢者告焉不以寄混同公蓋仍不欲其譚河事也

導河書一

陳黃中

河入中國四千年陵谷有變易而天運有循環其遷徙之源流隄防之大略考之於古驗之於今得失具在可畫地而談也夫河自禹至五代北流者幾三千年漢武帝時南注鉅野通淮泗武帝發數萬人塞之導河北行復禹舊蹟自是至唐千年河無大患晉開運中河決於滑浸汴曹濮單鄆五州環梁山台汶水與南旺蜀山湖連河始自北而東宋嘉祐中分爲二流由大名東至德滄入海者爲東流由大名北至恩冀乾甯宋乾甯軍今入海者爲北流熙寧中河又南徙分爲二

派一合南清河入淮一合北清河入海河又自東而南元豐
後又折而北文彥博諸人力主回東之議竭天下之力以塞
之元符二年六月河決內黃口勢全北流東流遂絕北流合
御河至滄州入海頗爲通利南渡地入於金河始離濬滑故
道時有決溢明昌五年河決陽武由封邱東注梁山樂仍分
爲二派由南北兩清河分入淮海汲冢之間禹河下流遂絕
自是歷元明二代河勢益趨於南遂會淮於安東入海淮爲
黃河所奪流不能駛因瀦於洪澤湖爲害益甚明潘季馴始
用束淮刷沙法導洪澤所注淮水引七分入清口刷黃分三
分由運河以達之江外築高家堰使東淮有力內設船疏浚
運河深通自是數十年無水患亦所謂因勢利導故奏功獨
多蓋自宋以來治河之善未有過之者自國初防海寇軼

入雲梯關於關口分列梅花椿而海口漸淤自設葦蕩營於淤地而海口日塞自引洪澤湖水入高寶湖而淮弱黃緩清口亦日壅迄今又數十年下流之塞者益多則上流之決者日甚此勢之所必然者是以邇年河水漲溢卽直注洪澤於是以一湖而全注黃淮二瀆之水湖身旣不能容又黃水挾沙淤墊洪澤益加淺狹非東溢高寶卽西注微山淮揚徐海郡縣歲被其害不得耕穫者且將十年前後賑恤蠲貸不下數千萬而其害正未底止今則洪澤溢於東而下河百萬生靈有災決棟焚之勢二十鹽場亦危如累卵大河正溜大半注於微山豐沛蕭陽先受其災兗豫二州必繼蒙其害而司水之臣坐視異災束手無措其平居所謂治河之略不過減歲費督夫役覈工料而已至地形之高下水勢之順逆茫乎

未之講求徒惴惴焉爲不終日之謀歲修而月搶東塞而西決以僥倖於無事一經異漲則謬於運數之適然而生民之魚鼈國帑之虛糜若以爲固當然者徒使

九重宵旰閭閻蕩析歲以數百萬之民命數百萬之民財直付之洪波巨浸而終無紀極不有變通其何以善其後故今日非得通知古今深曉地勢者會全局於胸中施救時之方略改弦而更張之吾見川壅而潰淮揚徐海之間充耶宋汴之境淪胥以鋪正未已也

導河書二

陳黃中

禹之治河也播九河醜二渠以河流湍悍故分河以殺其勢導河北行其所入之水猶少自是以後漢有屯氏及東郡渠唐中開古黃河於黎陽以決舊河水勢而滑州遂無水

患由宋及明中葉河雖東南行而宋分兩派元有三汊明於濮杞之間蘭陽儀封之境尙各有支渠不使并行一道今河流旣歸於一又自中牟以下合汴徐州以下合泗清口以下合淮口諸大水以助其勢奔騰迅激自數倍於禹時乃專恃一海口以爲尾閭之洩而海口又僅存昔日之二三如是而欲河不爲患必今之治水者愈於禹而後可也故欲除河患必先探其原悉其委其發也有自來則上流當多開引河以殺其湍其歸也有所瀦則下流當廣闊海口以暢其流夫河自大伾東走平地二千餘里始達於海合則勢強而衝天分則力弱而安流其勢然也爲今之計當先於河南山東二省河水經行之地相度形勢因其高下分導其流引湍悍者披爲支河捐卑下者瀦爲大澤疏其淤而洩其漲則上流有所

分而冲決之患自減至安東海口雖多淤塞然今漕標六營如東海之驚游門佃河之灌河口廟灣之窈港小關之野潮洋鹽城之新洋斗龍二港凡諸海口並去河不遠引而分注爲力甚易又葦蕩營及黑風口及射陽湖濱皆昔時河流入海之地今已淤塞數十里開之難以施工聽之貽害無已當盡舉此數十里之地委而捐之撤屯聚之兵民任河流之泛濫則海口旣復而下流壅滯之患亦除然此猶其小者夫河性無常南流已六百餘年今南河日淤高於北岸矣水勢就下當順其勢而利導之河南封邱北岸與直隸山東犬牙相錯當先以水平測量定其高下其封邱險口金龍爲最昔時北流舊蹟尙有存者若決金龍口由大名引而注之漳河合漳沱諸水借以刷沙達之天津以復北流故道南北分流河

患自減醜渠播河不泥其迹而師其意此功既成中州長免
潰決之憂南流可減非常之漲數百年之利其在是矣

導河書三

陳黃中

難者曰分上流以開支河通下流以闢海口必將移沿海之
營徙瀕河之戶計其工費非數百萬不足以集事今歲當大
決之後上下江災民計七百五十餘萬人國家發帑已至
八百三十餘萬兩米粟至三百萬石而蠲賦之數不與焉
聖主恩至渥也若復興茲大役國何以支而費何所出乎余
曰固也予不聞治天下之患者擇害莫若輕擇利莫若重乎
夫河患所以至斯極者以司水之臣頻年以來未知宣導之
方專以節費爲事故邇年江南河東兩總河之歲費不及今
振恤之二三玩愒歲月苟安目前養癰以待其決逮一發而

難收遂至國與民交受其害此已事之明驗也議者遂歸咎於節費之非不知其弊正不止此使治今之河無變今之法則節費亦決濫費亦決誠得幹濟者任之移此振恤之財卽爲治河之用選災民之強壯者什伍而聯屬之贍其身而役其力上不致坐食縣官虛費帑廩下可以撫安凋瘵永奠民居俟水行地中而上下江數十州縣之災地可耕可穫退淤之地其收自倍則國賦仍登民生保聚視徒急於振濟緩於治河以至年年告災議蠲議振未有窮已其利害相去萬萬矣難者曰上流分或致黃水細而妨漕運海口關或致水勢盛而決鹽場奈何余曰自明李化龍開泃河而呂梁之運道遂廢今之糧艘僅絕黃而一過固無須於濟運也且黃水果細則洪澤寬而高堰安淮湖盛則刷黃有力運河益清吾見

其利未見其害也況北地之用素無溝洫若分水法行則既殺河流又資灌溉更募江浙農人給以衣食農具俾以此教十數年之後其利溥矣至海口沮洳之區本當年黃水奔騰之地衝溢靡常故明淮分司所隸鹽場有十今已僅存板浦臨興中正三場而臨興乃先裁後復中正乃新設未久又皆屬晒鹽非有牢盆煎煮之事其地皆在海州迤北卽或有泛溢擇地而徙場行於昔者何不可行於今若海口不治而下河潰決將舉通泰二十二場盡沉于海子何置彼而慮此耶曰導河北流以復故道非常之原黎民懼焉子何言之易也余曰河之南也以宋人力塞北流河欲東則仰高而難行欲北則阻遏而中潰故放而南下今南河旣已日高則北地卑矣順下之性導其自然以復其故所謂行所無事因也非創

也夫前世之治者無論卽明之中葉如宋禮引汶水以濟運先測量水平計濟寧平地與徐州山嶺相準懸流三十丈故魯橋開以南稍啟立涸舟行半月始達東兗之民苦挑淺之役者百六十年自改鑿新渠導汶入運諸閘不煩啟閉舟行日百餘里而泃河未開之先初計費數百萬相視及當事者皆謂斷不可行潘季馴始尋蒿墟嶺故道尙未暇濬治後舒應龍稍從韓莊疏鑿至李化龍遂決意治之初尙濬淤艱阻後遂沛然通流費僅及二三遂得避黃淮三百里之險此兩人所奏之功皆創前人未有之蹟其遺利至今賴之亦惟能因水之性疏導得宜克成偉績況有成蹟之可因而顧諟古今人之不相及哉然苟非得其人任之專而用之久去其掣肘付以便宜吾亦未見事功之克集也

與某論漢儒品行書

焦循

循頓首白接讀手書得聞責過之言夫以循不肖而責之實以循可教而愛之且以循自誤而惜之也循聞之不禁背汗額泚愧悔交集特以弱冠以來嗜痂成癖習之既久性情安之亦如伶酒賀詩死亡莫變得聆至論感莫能從既而思之甚有不可不辨者誠以人心學問之所關非小故矣自南宋空衍理性而漢儒訓故之學幾卽於廢明末以來稍復古學攻擊肆情門戶遂立在前若楊升菴在後若毛大可其視宋儒有不異冠讐敵國之比者此實其根柢淺陋大體未明耳抑知儒者所奉孔子也孔子之科有四而止于二端曰言曰行而已六經者言也後世諸儒解其言者也秦人之語秦人能解之汾雒之人或半解之滇黔閩粵之間則茫然不知所

謂矣六經如秦漢儒如汾雒宋儒如滇黔閩粵今欲通秦人之言問之汾雒乎問之滇黔閩粵乎雖然汾雒非秦人也故說經之法必以經文爲之主而以漢儒爲之輔以通乎六經之言而非以求勝宋人故爲此也宋人若茂叔伊川考亭象山諸君子立忠孝之準畫利義之辨去欲存誠黜浮崇實所以翊孔子之教而爲萬古躬行實踐之則經訓雖疎何損大節不用其言而並黜其行其在聖門誼矣賊矣近年以來循方勘破此旨時以衾景之間不能無愧惟恐責循者持以訶之以爲徒漢學之軀殼不能體聖賢立教之心則是時將無地自容求死莫獲不料責循者之適相反也來書云欲求科第必學宋儒又云漢人品行不及宋人之恬淡旣以科第之學歸之宋儒則所謂宋儒者弟近來時文講章之宋儒庸下

之師假以餬口冒義理之說飾空陋之才陽挾爲道學之談
陰聳以爵祿之貴以拒高賢以抑弟子及叩以宋儒之書往
往不能舉其目程朱若在必移之于郊以是爲宋儒子亦過
矣且子謂宋儒恬淡漢人莫及其亦謂兩漢之學皆脂韋隨
俗干求利祿之徒乎循于史書多不記憶而漢儒本末則稍
稍能詳言之西漢之經學最顯莫如董子太史公云公孫宏
治春秋不如仲舒而希世用事位至公卿仲舒疾之其後辨
諸儒之議而興穀梁傳者蕭望之也望之與王仲翁俱爲丙
吉所薦並見霍光是時吏民當見者露索挾持望之獨不可
聽因不見用仲翁爲光祿大夫調望之曰不肯錄錄反抱關
爲望之曰各從其志二君之行可以見矣他如田何伏勝毛
萇王式之徒各守其業不聞有干求自貶之事若曰某爲丞

相某爲太守某爲御史大夫沾沾焉指以爲榮則班生之陋也東漢諸儒其跡尤顯帝問郊祀于鄭興興不爲識遂以不任其時上之好緯臣下所知使興志在榮祿何自持所學不敢稍變以媚人主康成杜門其始由于黨禁固曰勢無已也久之黨禁旣開一則幅巾見何進一宿逃去再則以袁紹之舉徵爲司農乞歸不仕清風介節皎耀千古張平子通五經貫六藝舉孝廉辟公府皆不就史稱其從容淡靜誠有然者又如申屠蟠學貫五經兼明圖緯隱居不仕傭爲漆工周彥祖少通詩論長精禮易陂田自給悔於滑泥其列儒林傳者劉桓公習施氏之易舉孝廉而逃教授于江陵孔子建傳古文尙書其對崔篆曰吾有布衣之心子有袞冕之志各從所好不亦善乎楊文義精習韓詩經中博士自以年未五十不

膺舊科上府讓選何邵公精研六經通公羊孝經論語風角
七分以列卿子詔拜郎中非其所好辭病而去其顓子嚴蔡
叔陵趙岐盧植並能耻交權貴徵聘不起誠皆耽志詩書無
心利祿非同以口舌文章鉤致名譽惟劉歆張禹戴聖馬融
之徒志存嬖鄙爲世所譏以此概漢儒豈盡然哉卽令兩漢
經生率皆夤緣躁競之流輩爲其學亦惟師其言而置其行
孔子曰不以言取人不以人廢言言與行之不能相提並論
久矣子責循循不能辨子誣漢儒循能已於言哉直言無狀
惟更教正之幸甚

復戴東原言理欲書

陸燿

春秋接書久未裁復紛紜案牘之中力小任重日夜惶疚卽
此稽緩亦足見其才力之困也閣下究心典籍高出羣儒修

述之事方期身任胡遽有秋令假歸之語行止何如臨期尙
祈示及如果言旋尙可迂道濟南一訪雒華之勝尤所跂望
來教舉近儒理欲之說而謂其以有蔽之心發爲意見自以
爲得理而所執之理實謬可謂切中俗儒之病乃原其病之
所起則驚名之一念實爲之蓋自宋儒言理而歷代推尊以
爲直接孔孟者程朱數大儒而已於是莫不以理名學如前
世所譏太極圈兒大先生帽子高者其來已非一世繇理學
之名可以虛附故也夫理懸於虛事徵於實虛者易冒實者
難欺唯言理而著之於事證之於跡空虛無實之談庶不得
而妄託西山大學衍義此其宗乎至於朱陸王之辨近世尤
多聚訟其所訟者皆在豪釐影響之間若盡舉朱子之行社
倉復水利蠲稅銀與象山之孝友於家惠愛於民陽明之經

濟事功彪炳史冊以爲理學真儒之左契則豐相之圃勵有
存者矣顧以此求之詎易多得則擇其言之切於今者莫如
顧崑山之行已有恥田簣山利之一字蝕人最深二語爲廢
疾膏肓之藥石沉迷大寐之晨鐘而不貴言性言命存天理
遏人欲之虛談庶幾於風俗之盛衰吏治之得失民生之疾
苦在在與民同好惡而不私於閣下之教得毋近之而不止
以其名乎近日從事文鈔一編大指如此惟是所見不多網
羅未盡淺人易炫決擇未精其中不無遺憾是以未敢郵正
今大教諄諄似欲匡其所不逮者又可不獻其醜拙耶耀再
拜

與楊觀察書

王元啟

二十六日接到心經淺釋一冊盥手莊誦得見前輩嗜學不

倦與其開示後學之盛心欣感交并不禁肅然起立歎仰不
置蓋揚雄不好非聖之書而於晏墨鄒莊申韓諸子無所不
讀至於陰陽土地星辰方藥之書無關遠大韓愈氏亦云古
之人未有不通此而能爲大賢君子者又況佛氏所說多治
心養性之旨非方伎小道及諸子怪僻險賊之流可比而心
經發明真空實相實爲五千四十八卷之總要儒者尤不可
以不之考也顧西土梵音多華人所不解而禪門宗旨與其
中分條析目之語類非儒籍所有不加訓釋無以通其義而
得其旨意所歸然或刻意求深反足滯學人之妙悟唯爲疏
明其大旨而至理元渺則在乎讀者之深思而自得之此淺
釋之所爲作也今卽訓釋所及通以吾儒之理則六根六塵
者耳目口鼻四肢之欲及聲色臭味安逸諸外遇是也所謂

五蘊則孟子所謂蔽也交也引也卽空卽色則有物有則之義也空中無諸蘊諸入諸界諸因緣諸諦則無聲無臭之原也不生不滅不偏不倚之中不以寂感而殊不垢不淨不磷不緇之體不以磨泐而變不增不減不加不損之分不以行藏而異也遠離諸苦究竟涅槃成正等覺則樂天知命之境孔顏所以無入而不自得也信知佛書精要要不外乎吾儒昔人所以喜其與易論語合者此也元啟舊於僧寺得楞嚴全部讀之愛其詞旨精闢其於根塵相入及指明空塵客主之義歷示諸種修行漸次剖析精微細入芒髮竊歎禪學雖崇頓悟要亦必由格物致知而入如來於一切世間義諦無不有以究極其微豈非所謂明於庶物而能有以盡其心之全量者乎或者以聲聞緣覺皆落第二義元啟獨謂人不盡

生安之聖卽西土所產亦不盡如來如來之智慧自誠而明者也其由聲聞緣覺入者自明而誠者也然則格物致知之功雖佛氏之學亦豈能有外焉乎雖然儒者之學明於庶物尤必察於人倫於人倫各盡其所當然則耳目口體之欲自淡物交自不能引一切五蘊六塵自歸清淨佛氏但求清淨則一清淨而遂無餘事蓋吾儒以盡倫理而得清淨佛以廢倫理而求清淨本末乖違此儒釋所以判若天淵必不能相合也鄉先賢陸清獻公題魯柏院詩有云當年可惜生西土不到尼山講五倫今讀此書序謂按之人倫事物而實體之卽入聖階梯也千聖心傳一言道破儒釋之辨炳若丹青夫如是又何必爭勝於口舌之間嘵嘵以闢佛爲能哉昔朱子自謂精通禪理故能不爲所惑世儒妄肆掊擊蓋猶不盡其

辭而強欲斷其獄之曲直豈可得乎今爲訓釋其義俾學者
得以廣所見聞而復爲序以冠其首使的然知聖學之有在
不至浸淫其中而不知所返其有助於存心養性之訓而爲
功吾道者豈其微哉一水之隔不獲躬赴函丈面承剖示竊
自責其區區之見殊知不足仰贊高深於萬一倍增汗囁

與王惺齋論佛教書

陸燿

蒿庵釋迦院記作彼教中語爲大儒之玷不能無待於後來
者之去取先生之言良是也如大著虎頭巖募疏以其爲龜
山過化之地浮屠祖真母孔姥壽序以其能節食養母異於
呂炁廖甲之絕倫理而憐游兼明繪父像於師旁雖不中禮
猶有仁孝之思是皆有憫俗警世之意而出以昌黎震川之
筆比之蒿庵洵爲過之惟與楊觀察書以爲佛教勝於陰陽

土地星辰方藥諸書儒者不可以不考則蒙竊有所未安佛
書精要不外吾儒其往往與易論語合正其竊吾易論語之
糟粕而爲說以惑人耳蓋竊吾聲色臭味安佚諸外遇之名
而謂之六塵六根竊吾有物有則之義而謂之卽空卽色竊
吾不偏不倚不以寂感而殊者而謂之不生不滅竊吾不礙
不維不以磨涅而變者而謂之不垢不淨竊吾不加不損不
以行藏而異者而謂之不增不減竊吾樂天知命之境孔顏
所以無入而不自得者而謂之遠離諸苦究竟涅槃成正等
覺脍吾饑而發吾藏得吾似以亂吾真宜在誅絕之條久矣
今大著似謂西方真有聖人其書皆與吾合學者不可不閱
其經卷得毋欲止沸而又益之薪乎又謂禪學亦致知格物
亦明於庶物如來之智慧自誠而明其由聲聞緣覺入者自

明而誠而特未察於人倫以此爲儒釋之辨夫旣未察於人倫誠於何寄明於何著不合意心身家國天下以爲學所格何物所致何知此雖不爲彼法中語而固與蒿庵立說之意甚異矣祖真兼明一細行之類儒先生卽引而進之樂善之懷如此其恕蒿庵一文辭之似佛近人卽推而遠之議論之口如此其嚴此文行世恐復有以其刻論蒿庵者移之大著也故敢竊貢其愚臨楮惶恐不宣

答滋圃中丞論推命書

袁枚

公以撫軍之尊而手書勸勤求馬叟推命僕心大不喜夫命孔子之所不知也馬叟何人其聖於孔子乎而能知也子曰不知命無以爲君子知卽知其不可知者而已知其不可知故其所可知者不惑也堯之時臯夔隆貴人之言其命達其

騶流放人不言其命窮及西伯戡黎紂無以自解乃歎曰我
生不有命在天非唐虞時無命桀紂時有命也理不足而后
求諸數也公生堯舜之世身爲臯夔理宜顯貴理宜平善何
嫌何疑而欲數之求古之神于命者首稱唐李虛中然虛中
餌金丹疽發背亡其于知命果如何也世人村氓里媼屢屯
已極偶一啼求之冀異日享嘉當亦人情所應有乃往往貧
賤之人轉不爲此而愈顯貴者則愈爲之并愈信葬禁宅忌
之說此無他射黃金注者外重則內惑故也然藉此爲趨避
計則方寸中乍冰乍火何以稱職任事勤施於四方也且彼
言吉歟公如命何彼言凶歟公如命何倘吉可趨凶可避是
無命也不必知也吉不可趨凶不可避是有命知如不知也
福善禍淫者天也求之于命是無天也賞善罰惡者君也求

之于命是無君也古大撓定支干毫無義意猶之一二三四紀數名云爾一二三四無可推則甲乙子丑亦無可推費補之言一時生一人一日夜生十二人以卒歲計之只四千三百二十人以一甲子計之只二十五萬九千二百人今一郡中戶口不下數百萬則年月日時同者多矣又何貧富貴賤之紛紛乎文文山贈朱斗南序宋景濂祿命論亦稱命只五十一萬八千而四柱盡矣餘皆雷同古所稱知命者邾文公楚昭王皆以不知知之天道遠人道邇捨人而言天大半恍惚凡一切時日小數陰陽祿家愈神奇則愈受禍史冊中如郭璞郭璞輩何可勝數然天下無業之氓太多不得已托九流祿技以謀其生當亦先王所不禁仁人君子妄言妄聽優俳畜之亦無所爲非若竟倚奉如神而且有抑抑求教之意

則此輩無識或借此恫喝鄉閭誣謗公事覲然與士大夫抗
禮是則王制所謂假鬼神時日以惑眾者殺可也易稱樂天
知命子思稱居易以俟命孟子稱修身以立命陸贄稱君相
造命孔子則罕言命公之命亦知之俟之立之造之罕言之
而已何必推

與蕭蓋思書

王元啟

某嘗謂物生修短之數有定而亦無定欲使朝槿夕榮春草
冬綠雖造物者亦復力有所窮此其數之有定者也然而世
所稱後彫之質當其未成拱把而或夭折於牛羊斤斧之摧
殘者乃亦不可勝數何哉蓋凡物之短者必不能引之使長
長者獨可以戕之使短此固性命自然之理也莊子謂莫壽
於殤子而彭聃爲天年如彭聃何以猶謂之天蓋既有此生

卽不能無悲喜憂樂之情悲喜憂樂一動於其內卽不能無
傷其性命之和雖其年至八百而歿安知非與接爲構日以
心鬪者之有以夭折其生而使之不復能永乎若夫殤子之
死生則如槿華之朝榮而夕萎草蔓之春綠而冬蕪循其所
得於天之分以自爲終始其於性命本然之理固已具足無
欠矣夫能無所欠於性命之理卽孰更有壽於此者乎來書
謂令姪夭折以此鬱鬱於中不知彼非夭折其於所得於天
之分僅至於此卽莊生所謂莫壽焉者而足下卒能割恩忍
愛一舉而歸之於天此真達觀之見然則修短之理足下亦
旣知之矣僕雖重累其辭乃所謂進其鑒飫者祇增愧耳前
者書硯之餽禮意甚隆然所托先府君贊辭至今未能如教
作此書已又使我慚惶汗出也